



UNDANG-UNDANG MALAYSIA

CETAKAN SEMULA

Akta 110

AKTA LEMBAGA PERTUBUHAN PELADANG 1973

Mengandungi segala pindaan hingga 1 Januari 2006

DITERBITKAN OLEH
PESURUHJAYA PENYEMAK UNDANG-UNDANG, MALAYSIA
DI BAWAH KUASA AKTA PENYEMAKAN UNDANG-UNDANG 1968
SECARA USAHA SAMA DENGAN
PERCETAKAN NASIONAL MALAYSIA BHD
2006

**AKTA LEMBAGA PERTUBUHAN
PELADANG 1973**

Tarikh Perkenan Diraja	15 Jun 1973
Tarikh penyiaran dalam <i>Warta</i>	21 Jun 1973

CETAKAN SEMULA YANG TERDAHULU

<i>Cetakan Semula Yang Pertama</i>	1994
<i>Cetakan Semula Yang Kedua</i>	2000

UNDANG-UNDANG MALAYSIA

Akta 110

AKTA LEMBAGA PERTUBUHAN PELADANG 1973

SUSUNAN SEKSYEN

BAHAGIAN I

PERMULAAN

Seksyen

1. Tajuk ringkas dan permulaan kuat kuasa
2. Tafsiran

BAHAGIAN II

LEMBAGA

3. Lembaga
4. Fungsi Lembaga
5. Keanggotaan Lembaga
6. Penubuhan Majlis
7. Perlindungan Pihak Berkuasa Awam
8. Pekhidmat awam
9. Kuasa Menteri untuk memberikan arahan
10. Kawasan Kemajuan Peladang
11. Fungsi tambahan Lembaga
12. Penyata, laporan, akaun dan maklumat

BAHAGIAN III

BAHAGIAN, PEGAWAI DAN PEKHIDMAT

Seksyen

13. Pengerusi hendaklah menjadi ketua pegawai pengurus
14. Ketua Pengarah hendaklah menjadi Ketua Pegawai Kerja
15. Pelantikan pegawai dan pekhidmat lain
16. Bahagian boleh didirikan
17. Tatatertib pegawai dan pekhidmat
- 17A. Penubuhan Lembaga Rayuan Tatatertib
- 17B. Penamatan demi kepentingan awam
18. Peraturan-peraturan berkenaan dengan syarat perkhidmatan bagi pegawai dan pekhidmat

BAHAGIAN IV

KEWANGAN

19. Penubuhan Kumpulan Wang
20. Pengimbangan akaun hasil
21. Kumpulan wang rizab
22. Perbelanjaan hendaklah dipertanggungjawabkan pada Kumpulan Wang
23. Perbelanjaan dan penyediaan Anggaran
24. Akaun dan audit
- 24A. Surcaj

BAHAGIAN V

KUASA LAIN LEMBAGA

25. Perwakilan kuasa Lembaga
26. Kuasa untuk meminjam
27. Pelaburan
28. Kuasa untuk mengambil kerja ejen
29. Kuasa untuk memberikan pinjaman
30. Kuasa menubuhkan perbadanan
31. Pengambilan tanah dengan paksa

BAHAGIAN VI

AM

Seksyen

32. *(Dipotong)*
33. Obligasi kerahsiaan
34. Prosiding sivil
35. Kesalahan mengenai pinjaman dan beban membuktikan
36. Keizinan Pendakwa Raya
37. Kuasa untuk membuat peraturan-peraturan
38. Perkara yang dilakukan pada menjangkakan Akta ini diperbuat

JADUAL PERTAMA

JADUAL KEDUA

JADUAL KETIGA

JADUAL KEEMPAT

UNDANG-UNDANG MALAYSIA

Akta 110

AKTA LEMBAGA PERTUBUHAN PELADANG 1973

Suatu Akta bagi memperbadankan Lembaga Pertubuhan Peladang dan bagi membuat peruntukan mengenai perkara yang berkaitan dengannya.

[14 Februari 1973]

MAKA INILAH DIPERBUAT UNDANG-UNDANG oleh Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti yang berikut:

BAHAGIAN I

PERMULAAN

Tajuk ringkas dan permulaan kuat kuasa

1. Akta ini bolehlah dinamakan Akta Lembaga Pertubuhan Peladang 1973, dan hendaklah disifatkan telah mula berkuat kuasa pada 14 Februari 1973.

Tafsiran

2. Dalam Akta ini, melainkan jika konteksnya menghendaki makna yang lain—

“Kawasan Kemajuan Peladang” ertinya sesuatu kawasan di mana kemajuan pertanian dan ekonomi yang diperhebat digalakkan dan yang hendaklah ditentukan oleh Menteri mengikut seksyen 10;

“Kumpulan Wang” ertinya kumpulan wang yang ditubuhkan di bawah seksyen 19;

“Lembaga” ertinya Lembaga Pertubuhan Peladang yang ditubuhkan di bawah seksyen 3;

“Majlis” ertinya Majlis Penasihat Peladang yang ditubuhkan di bawah seksyen 6;

“Pengerusi” ertinya Pengerusi Lembaga yang dilantik di bawah seksyen 5;

“perbadanan” ertinya sesuatu perbadanan yang ditubuhkan di bawah seksyen 30;

“Pertubuhan Peladang” ertinya sesuatu Pertubuhan Peladang yang ditubuhkan di bawah Akta Pertubuhan Peladang 1973 [*Akta 109*];

“syarikat” mempunyai erti yang sama seperti yang diberikan kepada “perbadanan” di bawah subseksyen 4(1) Akta Syarikat 1965 [*Akta 125*];

“Timbalan Pengerusi” ertinya Timbalan Pengerusi Lembaga yang dilantik di bawah seksyen 5.

BAHAGIAN II

LEMBAGA

Lembaga

3. Dengan ini ditubuhkan suatu pertubuhan perbadanan bernama Lembaga Pertubuhan Peladang yang kekal turun-temurun dan mempunyai suatu meterai perbadanan dan yang boleh mendakwa dan didakwa atas namanya dan, tertakluk kepada dan bagi maksud Akta ini, boleh membuat kontrak dan boleh memperoleh, membeli, mengambil, memegang dan menikmati harta alih dan harta tak alih daripada segala jenis dan boleh memindahhakkan, menyerahhakkan, menyerahkan balik, memulangkan, menggadaikan, menggadai-janjikan, mendemiskan, menyerahhakkan semula, memindahmilikkan atau dengan cara lain melupuskan, atau membuat apa-apa urusan mengenai, apa-apa harta alih atau harta tak alih atau apa-apa kepentingan mengenainya yang terletak hak pada Lembaga mengikut apa-apa terma sebagaimana yang difikirkannya patut.

Fungsi Lembaga

4. (1) Fungsi Lembaga ialah—

- (a) menggalakkan, mempergiat, memudahkan dan mengusahakan kemajuan ekonomi dan sosial Pertubuhan Peladang;

- (b) mendaftar, mengawal dan menyelia Pertubuhan Peladang dan mengadakan peruntukan bagi perkara yang berkaitan dengannya;
- (c) jika suatu perisytiharan melalui pemberitahuan telah dibuat di bawah seksyen 10, merancang dan mengusahakan apa-apa kemajuan pertanian di dalam Kawasan Kemajuan Peladang itu; dan
- (d) untuk mengawal dan menyelaraskan pelaksanaan aktiviti yang disebut terdahulu.

(2) Lembaga hendaklah mempunyai kuasa untuk melakukan segala perkara yang suai manfaat atau semunasabahnya perlu atau yang bersampingan dengan penjalanan fungsinya, dan khususnya, tetapi tanpa menyentuh keluasan yang disebut terdahulu—

- (a) untuk menjalankan segala aktiviti, khususnya perusahaan perdagangan dan perindustrian yang penjalanannya, pada pendapat Lembaga, adalah perlu, berfaedah atau sesuai untuk atau berkaitan dengan penjalanan fungsinya yang tersebut itu, termasuk pengeluaran utama, pengilangan, pengumpulan, pemprosesan, pembungkusan, pemingkatan dan pemasaran keluaran pertanian, penyelidikan dan latihan;
- (b) untuk memulakan kajian permulaan mengenai kemungkinan mengadakan kemajuan dan kemajuan semula pertanian dan membuat rancangan permulaan yang menunjukkan ringkasan aktiviti kemajuan atau kemajuan semula pertanian dan tinjauan permulaan bagi menentukan sama ada fungsi mengusahakan dan menjalankan projek kemajuan atau kemajuan semula pertanian itu dapat dijalankan sebagai suatu perusahaan bagi Pertubuhan Peladang;
- (c) untuk bekerjasama dengan atau bertindak sebagai ejen atau ejen pengurusan bagi atau dengan cara lain bertindak secara bersekutu dengan atau bagi pihak Kerajaan Persekutuan atau Kerajaan mana-mana Negeri, mana-mana pihak berkuasa awam, mana-mana syarikat, mana-mana perbadanan, mana-mana badan atau mana-mana orang;
- (d) untuk menggalakkan dan menyelaraskan perjalanan aktiviti itu oleh Kerajaan, pihak berkuasa awam, mana-mana syarikat, perbadanan, atau badan atau orang lain;

- (e) untuk menubuhkan atau memperluas, atau menggalakkan penubuhan atau pemerluasan, syarikat, perbadanan atau badan lain untuk menjalankan mana-mana aktiviti itu sama ada di bawah kawalan atau sebahagian kawalan Lembaga atau dengan bebas;
- (f) untuk memberi bantuan kepada Pertubuhan Peladang, pihak berkuasa awam, syarikat, perbadanan atau badan atau orang lain yang pada pendapat Lembaga mempunyai kemudahan untuk menjalankan mana-mana aktiviti itu, termasuk bantuan kewangan dengan mengambil syer atau modal pinjaman atau dengan pinjaman atau selainnya;
- (g) untuk membeli, menanggung atau dengan cara lain memperoleh apa-apa saham dan syer dalam mana-mana syarikat awam atau syarikat persendirian dan untuk melupuskannya sama ada kepada Pertubuhan Peladang atau orang lain atas apa-apa terma dan syarat sebagaimana yang ditentukan oleh Lembaga;
- (h) untuk meminta jabatan, agensi kerajaan dan bukan kerajaan yang bertugas dalam menjalankan atau yang bercadang hendak menjalankan kemajuan berasaskan pertanian bagi faedah peladang supaya mengemukakan laporan berkenaan dengan aktiviti atau aktiviti cadangannya yang mengandungi apa-apa butir-butir dan maklumat sebagaimana yang ditentukan oleh Lembaga dan untuk bekerjasama dengan Lembaga dalam usahanya untuk memajukan Pertubuhan Peladang;
- (i) untuk melantik ejen atau menubuhkan apa-apa badan lain sebagaimana yang difikirkannya patut bagi maksud menjalankan fungsinya;
- (j) untuk mengenakan bayaran atau apa-apa caj lain sebagaimana yang difikirkannya patut bagi melaksanakan mana-mana daripada kuasa atau fungsinya;
- (k) untuk menerima, sebagai balasan bagi perkhidmatan yang diberikan olehnya, apa-apa komisen atau bayaran sebagaimana yang dipersetujui;
- (l) untuk membuat peraturan mengenai kemajuan dalam Kawasan Kemajuan Peladang; dan

- (m) untuk melakukan apa-apa perkara lain sebagaimana yang difikirkannya patut bagi menjalankan fungsi dan kuasanya dengan berkesan.

(3) Tertakluk kepada seksyen 8, adalah menjadi tanggungjawab Lembaga pada menjalankan fungsinya di bawah Akta ini untuk memastikan bahawa fungsi itu dilaksanakan dengan cara yang akan memajukan dasar Kerajaan yang pada masa ini berkuat kuasa dan, khususnya, dasar yang berhubungan dengan pembentukan semula masyarakat.

Keanggotaan Lembaga

5. (1) Lembaga hendaklah terdiri daripada anggota yang berikut yang dilantik oleh Menteri:

- (a) seorang Pengerusi;
- (b) seorang Timbalan Pengerusi;
- (c) Ketua Pengarah; dan
- (d) enam orang anggota lain, tidak lebih daripada empat daripadanya hendaklah daripada perkhidmatan awam.

(2) Jadual Pertama kepada Akta ini hendaklah terpakai bagi anggota Lembaga.

Penubuhan Majlis

6. (1) Dengan ini ditubuhkan suatu badan bernama “Majlis Penasihat Peladang” yang fungsinya ialah—

- (a) pada amnya menasihati Menteri tentang perkara berkenaan dengan kemajuan Pertubuhan Peladang; dan
- (b) menasihati Menteri tentang apa-apa perkara yang dirujuk kepada Menteri.

(2) Majlis itu hendaklah terdiri daripada anggota yang berikut:

- (a) Pengerusi Lembaga yang hendaklah menjadi Pengerusi Majlis;
- (b) Timbalan Pengerusi Lembaga yang hendaklah menjadi Timbalan Pengerusi Majlis;

- (c) Ketua Pengarah Lembaga yang hendaklah menjadi Setiausaha Majlis;
- (d) Ketua Pengarah Pertanian;
- (e) Ketua Pengarah Jabatan Pembangunan Koperasi;
- (f) seorang wakil Kementerian Pertanian dan Industri Asas Tani;
- (g) seorang wakil Kementerian Kemajuan Luar Bandar dan Wilayah;
- (h) seorang wakil Kementerian Perusahaan Perladangan dan Komoditi;
- (i) seorang wakil Perbendaharaan;
- (j) seorang wakil Kementerian Perdagangan Dalam Negeri dan Hal Ehwal Pengguna;
- (k) seorang wakil Jabatan Perdana Menteri;
- (l) seorang wakil dari setiap Negeri dalam Malaysia; dan
- (m) tidak lebih daripada enam orang anggota lain yang dilantik oleh Menteri.

(3) Perenggan 1, 2, 3, 7, 8 dan 9 dan subperenggan 4(3), 4(4) dan 4(5) Jadual Pertama hendaklah terpakai bagi Majlis dengan apa-apa ubah suaian yang perlu.

(4) Majlis hendaklah bermesyuarat sekurang-kurangnya dua kali dalam tiap-tiap tahun kalendar.

(5) Pengerusi, Timbalan Pengerusi atau anggota yang mempengerusikan mesyuarat itu dan sepuluh orang anggota lain hendaklah menjadi kuorum dalam mana-mana mesyuarat Majlis.

Perlindungan Pihak Berkuasa Awam

7. Akta Perlindungan Pihak Berkuasa Awam 1948 [*Akta 198*] hendaklah terpakai bagi apa-apa tindakan, guaman, pendakwaan atau prosiding terhadap Lembaga atau terhadap seseorang anggota, pegawai, pekhidmat atau ejen Lembaga berkenaan dengan apa-apa perbuatan, keabaihan atau keingkaran yang dibuat atau dilakukan olehnya atas sifatnya yang demikian itu.

Pekhidmat awam

8. Semua anggota, pegawai dan pekhidmat Lembaga hendaklah disifatkan sebagai pekhidmat awam dalam erti Kanun Keseksaan [Akta 574] semasa menjalankan kewajipan mereka sebagai anggota, pegawai atau pekhidmat itu.

Kuasa Menteri untuk memberikan arahan

9. (1) Lembaga hendaklah bertanggungjawab kepada Menteri, dan Menteri boleh, dari semasa ke semasa, memberikan arahan yang tidak bertentangan dengan peruntukan Akta ini dan Lembaga hendaklah melaksanakan semua arahan itu dengan seberapa segera yang mungkin.

(2) Tanpa menyentuh keluasan subseksyen (1), dan tertakluk kepada rundingan dengan Lembaga, kuasa Menteri untuk memberikan arahan hendaklah termasuk memberikan arahan kepada Lembaga—

(a) tentang pelupusan aset modal; dan

(b) tentang penggunaan hasil daripada pelupusan itu, walaupun arahan itu daripada sesuatu jenis yang tertentu:

Dengan syarat bahawa selagi apa-apa jumlah wang yang dipinjam oleh Lembaga mengikut peruntukan Akta ini masih belum selesai, maka tiada arahan boleh diberikan kecuali dengan persetujuan Menteri Kewangan.

Kawasan Kemajuan Peladang

10. (1) Bagi maksud Akta ini, Menteri boleh, selepas berunding dengan Kerajaan Negeri dan mana-mana pihak berkuasa awam lain yang, pada pendapat Menteri, akan terlibat dengan perisytiharan itu, mengisytiharkan melalui pemberitahuan dalam *Warta* kawasan yang di dalamnya Lembaga boleh menjalankan fungsinya di bawah Akta ini dan kawasan itu hendaklah dikenali sebagai Kawasan Kemajuan Peladang.

(2) Walau apa pun peruntukan undang-undang bertulis yang lain, hendaklah menjadi tanggungjawab Lembaga untuk menjalankan fungsi yang diperuntukkan oleh Akta ini dalam Kawasan Kemajuan Peladang.

Fungsi tambahan Lembaga

11. Sebagai tambahan kepada kewajipan yang dikenakan ke atas Lembaga dan kuasa yang terletak hak padanya oleh Akta ini, Lembaga boleh mengusahakan apa-apa fungsi lain, menjalankan apa-apa kuasa lain dan mentadbirkan dan membelanjakan apa-apa wang lain bagi apa-apa maksud sebagaimana yang diuntukkan atau diberikan kepadanya oleh Kerajaan Persekutuan atau Kerajaan mana-mana Negeri dan pada berbuat demikian itu, Lembaga hendaklah disifatkan memenuhi maksud Akta ini dan peruntukan Akta ini hendaklah terpakai bagi Lembaga berkenaan dengan fungsi itu dan pentadbiran dan perbelanjaan wang itu:

Dengan syarat sentiasa bahawa akaun bagi wang itu hendaklah disimpan berasingan dan berlainan daripada akaun Kumpulan Wang.

Penyata, laporan, akaun dan maklumat

12. (1) Lembaga hendaklah memberi kepada Menteri dan mana-mana orang, kumpulan orang atau pihak berkuasa awam lain sebagaimana yang diarahkan oleh Menteri, apa-apa penyata, laporan, akaun dan maklumat berkenaan dengan harta dan aktivitinya sebagaimana yang dikehendaki atau diarahkan oleh Menteri dari semasa ke semasa.

(2) Tanpa menyentuh keluasan subseksyen (1), Lembaga hendaklah, secepat yang dapat dilaksanakan, selepas berakhir setiap tahun kewangan, menyebabkan supaya dibuat dan dihantar kepada Menteri dan, jika diarahkan sedemikian oleh Menteri, kepada Kerajaan mana-mana Negeri atau mana-mana pihak berkuasa awam lain, suatu laporan berkenaan dengan aktiviti Lembaga dalam tahun kewangan yang lalu dan mengikut apa-apa bentuk dan mengandungi apa-apa maklumat yang berhubungan dengan prosiding dan dasar Lembaga sebagaimana yang ditentukan oleh Menteri dari semasa ke semasa.

(3) Menteri hendaklah menyebabkan suatu salinan tiap-tiap laporan itu dibentangkan di meja Dewan Rakyat.

BAHAGIAN III

BAHAGIAN, PEGAWAI DAN PEKHIDMAT

Pengerusi hendaklah menjadi ketua pegawai pengurus

13. (1) Pengerusi hendaklah bertanggungjawab bagi mengeluarkan panduan dasar atau penjelasan mengenai keputusan Lembaga.

(2) Pengerusi hendaklah menjalankan apa-apa kewajipan lain atau tambahan sebagaimana yang ditetapkan oleh Menteri dari semasa ke semasa.

(3) Jika Pengerusi tidak ada dalam Malaysia buat sementara atau tidak berupaya buat sementara kerana sakit atau apa-apa sebab lain yang cukup untuk menjalankan kewajibannya, Timbalan Pengerusi hendaklah menjalankan kewajibannya dalam masa dia tidak ada atau tidak berupaya buat sementara itu.

Ketua Pengarah hendaklah menjadi Ketua Pegawai Kerja

14. (1) Lembaga boleh, dengan kelulusan Menteri, mengambil kerja dan melantik seorang Ketua Pengarah untuk menjadi Ketua Pegawai Kerja atas apa-apa terma dan syarat dan bagi apa-apa tempoh sebagaimana yang ditetapkan oleh Lembaga.

(2) Ketua Pengarah hendaklah bertanggungjawab bagi menyediakan program, skim atau projek untuk pertimbangan Lembaga dan bagi melaksanakan program, skim atau projek itu dan arahan Pengerusi.

(3) Tertakluk kepada arahan Pengerusi, Ketua Pengarah mempunyai kuasa mengawal pegawai dan pekhidmat Lembaga dari segi pentadbiran.

(4) Ketua Pengarah hendaklah menjalankan apa-apa kewajipan lain atau tambahan sebagaimana yang ditetapkan oleh Lembaga atau Menteri dari semasa ke semasa atau sebagaimana yang diarahkan oleh Pengerusi dari semasa ke semasa.

Pelantikan pegawai dan pekhidmat lain

15. (1) Tertakluk kepada apa-apa peraturan yang dibuat di bawah seksyen 18, Lembaga boleh melantik atas apa-apa terma dan syarat sebagaimana yang difikirkannya wajar mana-mana orang sebagai Pegawai Kerja dan pegawai dan pekhidmat lain sebagaimana yang perlu bagi melaksanakan maksud Akta ini.

(2) Tiada seseorang pun layak diambil kerja sebagai Pegawai Kerja atau pegawai atau pekhidmat Lembaga jika orang itu, secara langsung atau secara tidak langsung, mempunyai sendirinya atau melalui pekongsinya, apa-apa syer atau kepentingan dalam sesuatu kontrak atau sesuatu kontrak yang dicadangkan dengan, untuk atau bagi pihak Lembaga.

(3) Mana-mana Pegawai Kerja atau pegawai atau pekhidmat Lembaga yang mempunyai atau memperoleh apa-apa syer atau kepentingan itu boleh menurut budi bicara Lembaga dibuang kerja secara terus tanpa notis.

Bahagian boleh didirikan

16. (1) Lembaga boleh mendirikan Bahagian yang difikirkannya wajar dan setiap Bahagian hendaklah di bawah kawalan dan jagaan seorang Pegawai Kerja.

(2) Adalah menjadi tanggungjawab Pegawai Kerja bagi sesuatu Bahagian yang berkenaan untuk melaksanakan dan menjalankan keputusan Lembaga atas perkara mengenai Bahagiannya, untuk mengemukakan syor dasar untuk pertimbangan Lembaga, untuk mengambil bahagian tanpa hak mengundi, dalam mana-mana mesyuarat Lembaga dan mesyuarat Majlis apabila perkara mengenai Bahagiannya ditimbang dalam mesyuarat itu dan juga untuk menjalankan segala kuasa yang boleh diwakilkan kepadanya oleh Lembaga.

Tatatertib pegawai dan pekhidmat

17. (1) Hendaklah ada suatu Jawatankuasa Tatatertib Lembaga yang hendaklah terdiri daripada dua orang anggota yang hendaklah dipilih oleh dan daripada anggota Lembaga, seorang daripada mereka hendaklah dipilih menjadi Pengerusi, dan Ketua Pengarah yang dilantik di bawah subseksyen 5(1).

(2) Pihak berkuasa tata tertib berkenaan dengan tiap-tiap pegawai dan penjawat Lembaga, selain Ketua Pengarah, ialah Jawatankuasa Tata tertib Lembaga yang ditubuhkan di bawah subseksyen (1).

(3) Pihak berkuasa tata tertib berkenaan dengan Ketua Pengarah ialah Jawatankuasa Tata tertib yang hendaklah terdiri daripada Ketua Setiausaha Kementerian Pertanian dan Industri Asas Tani sebagai Pengerusi dan dua orang anggota yang hendaklah dipilih oleh dan daripada anggota Lembaga.

(4) Ketua Pengarah tidak boleh menjadi anggota Jawatankuasa Tata tertib dalam apa-apa prosiding di hadapan Jawatankuasa itu yang di dalamnya dia menjadi pengadu; tempatnya hendaklah diambil oleh seorang ahli yang hendaklah dipilih oleh dan daripada anggota Lembaga.

(5) Pada menjalankan fungsi tata tertibnya, Jawatankuasa Tata tertib hendaklah mempunyai kuasa untuk mengenakan apa-apa hukuman tata tertib sebagaimana yang diperuntukkan di bawah mana-mana peraturan yang boleh dibuat di bawah seksyen 18.

(6) Jawatankuasa Tata tertib boleh, tertakluk kepada subseksyen (7), mewakili mana-mana fungsi, kuasa atau kewajipan tata tertibnya kepada mana-mana jawatankuasa pegawai atau pekhidmat Lembaga, berkenaan dengan mana-mana pegawai atau pekhidmat tertentu Lembaga atau berkenaan dengan mana-mana golongan atau kategori pegawai atau pekhidmat Lembaga, dan jawatankuasa yang kepadanya diwakilkan fungsi, kuasa atau kewajipan sedemikian hendaklah melaksanakan, menjalankan atau menunaikannya di bawah arahan dan kawalan Jawatankuasa Tata tertib yang hendaklah mempunyai kuasa untuk mengulang kaji, membatalkan atau mengubah apa-apa keputusan atau dapatan jawatankuasa sedemikian.

(7) Tiada perwakilan boleh dibuat di bawah subseksyen (6) untuk membolehkan seseorang pegawai atau pekhidmat Lembaga menjadi ahli sesuatu jawatankuasa yang boleh menjalankan apa-apa kuasa tata tertib ke atas pegawai atau pekhidmat yang berpangkat lebih tinggi daripadanya.

(8) Sesuatu keputusan Jawatankuasa Tata tertib yang ditubuhkan di bawah subseksyen (1) boleh dirayukan kepada Lembaga Rayuan Tata tertib yang ditubuhkan di bawah seksyen 17A.

(9) Sesuatu keputusan Jawatankuasa Tatatertib yang ditubuhkan di bawah subseksyen (3) boleh dirayukan kepada Menteri.

(10) Lembaga Rayuan Tatatertib atau Menteri, mengikut mana-mana yang berkenaan, boleh mengesahkan, mengakaskan atau mengubah keputusan Jawatankuasa Tatatertib.

(11) Keputusan Lembaga Rayuan Tatatertib atau Menteri di bawah subseksyen (10) adalah muktamad dan konklusif.

Penubuhan Lembaga Rayuan Tatatertib

17A. (1) Hendaklah ada suatu Lembaga Rayuan Tatatertib Lembaga yang hendaklah terdiri daripada ahli yang berikut:

- (a) Pengerusi, yang hendaklah menjadi pengerusi Lembaga Rayuan Tatatertib itu dan hendaklah mempunyai undi pemutus; dan
- (b) tiga orang anggota Lembaga, yang bukan anggota Jawatankuasa Tatatertib yang keputusannya ialah hal perkara rayuan itu, yang hendaklah dilantik oleh pengerusi Lembaga Rayuan Tatatertib itu dengan kelulusan Lembaga bagi maksud rayuan itu.

(2) Apabila Lembaga Rayuan Tatatertib menimbangkan sesuatu rayuan yang dibuat di bawah seksyen 17, seseorang anggota Jawatankuasa Tatatertib yang terhadap keputusannya rayuan itu dibuat yang juga anggota Lembaga tidak boleh hadir pada atau dengan apa-apa cara mengambil bahagian dalam apa-apa prosiding yang berhubungan dengan rayuan itu.

Penamatan demi kepentingan awam

17B. (1) Jika Lembaga mendapati atau jika representasi dibuat kepada Lembaga bahawa adalah wajar perkhidmatan seseorang pegawai atau pekhidmat ditamatkan demi kepentingan awam, Lembaga boleh meminta laporan penuh daripada pegawai atasan pegawai atau pekhidmat yang terhadapnya representasi itu dibuat yang hendaklah mengandungi butir-butir yang berhubungan dengan kerja dan kelakuan pegawai atau peskhidmat itu.

(2) Jika, setelah menimbangkan laporan yang diterima di bawah subseksyen (1), Lembaga berpuas hati bahawa setelah mengambil kira syarat perkhidmatan, kebergunaan pegawai atau pekhidmat itu, kerja dan kelakuan pegawai atau pekhidmat itu dan segala hal keadaan lain kes itu, adalah wajar demi kepentingan awam untuk berbuat demikian, Lembaga boleh menamatkan perkhidmatan pegawai atau pekhidmat itu mulai dari tarikh yang hendaklah ditentukan oleh Lembaga.

(3) Adalah sah di sisi undang-undang bagi Jawatankuasa Tatatertib yang berkenaan untuk mengesyorkan kepada Lembaga supaya perkhidmatan seseorang pegawai atau pekhidmat itu ditamatkan demi kepentingan awam walaupun prosiding tatatertib belum dijalankan di bawah Akta ini dan Lembaga boleh menamatkan perkhidmatan pegawai atau pekhidmat itu sedemikian.

(4) Walau apa pun apa-apa jua dalam Akta ini dan mana-mana undang-undang lain yang berlawanan, dalam menamatkan perkhidmatan seseorang pegawai atau pekhidmat demi kepentingan awam di bawah seksyen ini, pegawai atau pekhidmat itu tidak perlu diberi apa-apa peluang untuk didengar dan seseorang pegawai atau pekhidmat yang perkhidmatannya telah ditamatkan demi kepentingan awam di bawah seksyen ini tidak boleh dianggap telah dibuang kerja, tanpa mengira sama ada penamatan perkhidmatan pegawai atau pekhidmat itu melibatkan suatu unsur hukuman atau berkaitan dengan kelakuan yang berhubungan dengan jawatannya yang dianggap oleh Lembaga tidak memuaskan atau patut disalahkan.

Peraturan-peraturan berkenaan dengan syarat perkhidmatan bagi pegawai dan pekhidmat

18. (1) Lembaga boleh, dari semasa ke semasa, dengan kelulusan Menteri, membuat peraturan-peraturan berkenaan dengan syarat perkhidmatan bagi pegawai dan pekhidmatnya.

(2) Melainkan jika diperuntukkan selainnya, sebutan dalam Akta ini mengenai seorang pegawai Lembaga adalah termasuk sebutan mengenai Ketua Pengarah dan seseorang Pegawai Kerja.

(3) Tanpa menyentuh keluasan peruntukan yang terdahulu, peraturan-peraturan itu boleh mengadakan peruntukan bagi perkara yang dinyatakan dalam Jadual Kedua.

BAHAGIAN IV

KEWANGAN

Penubuhan Kumpulan Wang

19. (1) Bagi maksud Akta ini, dengan ini ditubuhkan suatu kumpulan wang yang hendaklah ditadbirkan dan dikawal oleh Lembaga.

(2) Kumpulan Wang itu hendaklah terdiri daripada—

- (a) apa-apa wang sebagaimana yang diperuntukkan dari semasa ke semasa bagi maksud itu oleh Parlimen atau Dewan Undangan sesuatu Negeri;
- (b) apa-apa wang sebagaimana yang diuntukkan dari semasa ke semasa oleh Lembaga daripada wang pinjaman;
- (c) wang yang didapati daripada menjalankan apa-apa projek, skim atau perusahaan yang dibiayai daripada Kumpulan Wang;
- (d) wang yang didapati atau yang terbit daripada apa-apa harta, pelaburan, gadai janji, gadaian atau debentur yang diperoleh oleh atau yang terletak hak pada Lembaga;
- (e) apa-apa harta, pelaburan, gadai janji, gadaian atau debentur yang diperoleh oleh atau yang terletak hak pada Lembaga;
- (f) wang yang dipinjam oleh Lembaga bagi maksud menjelaskan mana-mana daripada obligasinya atau menjalankan mana-mana daripada kewajipannya; dan
- (g) semua wang atau harta lain yang boleh dengan apa-apa cara menjadi kena dibayar kepada atau terletak hak pada Lembaga berkenaan dengan apa-apa perkara yang bersampingan dengan kuasa dan kewajipannya.

(3) Dalam seksyen ini, ungkapan “wang pinjaman” ertinya apa-apa wang yang dapat diadakan dari semasa ke semasa bagi Kerajaan Persekutuan atau Kerajaan mana-mana Negeri dengan cara pinjaman.

Pengimbangan akaun hasil

20. Adalah menjadi kewajipan Lembaga untuk memelihara Kumpulan Wang dengan menjalankan dan melaksanakan kuasa, fungsi dan kewajipannya di bawah Akta ini supaya jumlah hasil

Lembaga, tertakluk kepada apa-apa arahan yang diberikan oleh Menteri di bawah seksyen 9, cukup untuk membayar semua jumlah wang yang boleh dipertanggungjawabkan dengan sepatutnya kepada akaun hasilnya, termasuk, tanpa menyentuh keluasan ungkapan itu, peruntukan berkenaan dengan obligasinya di bawah seksyen 19 dan 21 dan kesusutan dan bunga atas modal, membandingkan satu tahun dengan satu tahun yang lain.

Kumpulan wang rizab

21. Lembaga hendaklah menubuhkan dan menguruskan suatu kumpulan wang rizab dalam Kumpulan Wang.

Perbelanjaan hendaklah dipertanggungjawabkan pada Kumpulan Wang

22. Kumpulan Wang hendaklah dibelanjakan bagi maksud—

- (a) membayar segala perbelanjaan yang dilakukan di bawah seksyen 27;
- (b) memberi pinjaman di bawah seksyen 29;
- (c) membayar apa-apa perbelanjaan yang dilakukan dengan sah oleh Lembaga, termasuk bayaran dan kos ukur, bayaran dan kos guaman dan bayaran dan kos lain, dan saraan bagi pegawai dan pekhidmat yang dilantik dan diambil kerja oleh Lembaga, termasuk elaun persaraan, pencen atau ganjaran;
- (d) membayar apa-apa belanja, kos atau perbelanjaan lain yang dilakukan atau disetuju terima dengan sepatutnya oleh Lembaga dalam melaksanakan kewajibannya atau menjalankan fungsinya di bawah seksyen 4;
- (e) membeli atau menyewa loji, kelengkapan, jentera, barang-barang dan apa-apa bahan lain dan memperoleh tanah dan mendirikan bangunan dan menjalankan apa-apa kerja dan pengusahaan lain dalam melaksanakan kewajibannya atau pada menjalankan fungsinya di bawah seksyen 4;
- (f) membayar balik apa-apa wang yang dipinjam di bawah Akta ini dan bunga yang kena dibayar atasnya; dan
- (g) pada amnya, membayar apa-apa belanja bagi melaksanakan peruntukan Akta ini.

Perbelanjaan dan penyediaan Anggaran

23. (1) Perbelanjaan Lembaga hingga sebanyak yang dibenarkan oleh Menteri bagi mana-mana satu tahun hendaklah dibayar daripada Kumpulan Wang.

(2) Sebelum permulaan bulan September setiap tahun, Lembaga hendaklah menghantar kepada Menteri suatu anggaran belanja (termasuk perbelanjaan bagi projek pembangunan) bagi tahun yang berikutnya mengikut apa-apa bentuk dan yang mengandungi apa-apa butir sebagaimana yang diarahkan oleh Menteri; dan sebelum permulaan tahun yang berikutnya, Menteri hendaklah memberitahu Lembaga amaun yang dibenarkan bagi perbelanjaan pada amnya atau amaun yang dibenarkan bagi setiap jenis perbelanjaan.

(3) Lembaga boleh pada bila-bila masa menghantar kepada Menteri suatu anggaran tambahan bagi mana-mana satu tahun dan Menteri boleh membenarkan kesemua atau mana-mana bahagian perbelanjaan tambahan yang dimasukkan di dalamnya itu.

(4) Menteri boleh mengarahkan Lembaga supaya menghantar suatu salinan anggaran atau anggaran tambahan itu, mengikut mana-mana yang berkenaan, kepada Kerajaan mana-mana Negeri atau kepada mana-mana orang lain sebagaimana yang ditentukan dalam arahan itu.

Akaun dan audit

24. (1) Lembaga hendaklah menyimpan dengan sepatutnya akaun dan rekod lain berkenaan dengan penjalanannya dan hendaklah menyediakan penyata akaun bagi setiap tahun kewangan.

(2) Akaun Lembaga hendaklah diaudit tiap-tiap tahun oleh Ketua Audit Negara atau juruaudit lain yang dilantik oleh Lembaga dengan kelulusan Menteri.

(3) Selepas akhir tahun kewangan itu, dan selepas sahaja akaun Lembaga diaudit, Lembaga hendaklah menyebabkan supaya suatu salinan penyata akaun itu dihantar kepada Menteri atau, apabila diarahkan sedemikian oleh Menteri, kepada mana-mana Kerajaan Negeri atau kepada mana-mana orang lain, bersama dengan suatu salinan apa-apa pandangan yang dibuat oleh Ketua Audit Negara atau juruaudit lain yang dilantik di bawah subseksyen (2) mengenai mana-mana penyata atau mengenai akaun Lembaga.

(4) Menteri hendaklah menyebabkan suatu salinan tiap-tiap penyata dan pandangan itu dibentangkan di meja Dewan Rakyat.

Surcaj

24A. (1) Jika ternyata pada Lembaga bahawa mana-mana orang yang sedang atau telah bekerja dengan Lembaga—

- (a) telah gagal mengutip apa-apa wang yang terhutang kepada Lembaga yang pemungutannya menjadi tanggungjawabnya;
- (b) adalah atau telah bertanggungjawab bagi apa-apa pembayaran wang daripada Kumpulan Wang yang tidak sepatutnya dibuat atau bagi apa-apa pembayaran wang yang tidak disahkan dengan sewajarnya;
- (c) adalah atau telah bertanggungjawab, secara langsung atau tidak langsung, bagi apa-apa kekurangan dalam, atau bagi pemusnahan, apa-apa wang, setem, sekuriti, barang simpanan atau harta lain Lembaga;
- (d) sebagai, atau sebagai seorang yang pernah menjadi seorang pegawai perakaunan, gagal atau telah gagal menyimpan akaun atau rekod yang sepatutnya;
- (e) telah gagal untuk membuat apa-apa pembayaran, atau adalah atau telah bertanggungjawab bagi apa-apa kelambatan dalam pembayaran, wang daripada Kumpulan Wang kepada mana-mana orang yang kepadanya bayaran itu kena dibayar di bawah mana-mana kontrak, perjanjian atau perkiraan yang dibuat antara orang itu dengan Lembaga,

Lembaga hendaklah menyampaikan suatu notis bertulis kepadanya yang memintanya supaya menunjukkan sebab mengapa dia tidak sepatutnya disurcaj, dan jika penjelasan yang memuaskan hati tidak diberikan, dalam tempoh empat belas hari dari tarikh penyampaian notis yang disebut terdahulu, kepada Lembaga berkenaan dengan kegagalan mengutip, pembayaran yang tidak sepatutnya dibuat, pembayaran yang tidak disahkan dengan sewajarnya, kekurangan atau pemusnahan, atau kegagalan menyimpan akaun atau rekod yang sepatutnya, atau kegagalan membuat pembayaran, atau kelambatan dalam membuat pembayaran maka Lembaga boleh mensurcaj terhadap orang tersebut sejumlah wang yang tidak melebihi amaun apa-apa amaun sedemikian yang tidak dikutip apa-apa pembayaran, kekurangan, atau kerugian atau nilai harta yang musnah, mengikut mana-mana yang berkenaan; dan

berkenaan dengan kegagalan untuk menyimpan akaun atau rekod yang sepatutnya, atau kegagalan untuk membuat pembayaran, atau kelambatan dalam membuat pembayaran, Lembaga boleh mensurcaj terhadap orang tersebut apa-apa jumlah wang sebagaimana yang difikirkan patut oleh Lembaga itu.

(2) Pengerusi hendaklah menyebabkan Ketua Pengarah diberitahu tentang apa-apa surcaj yang dibuat di bawah subseksyen (1) dan Ketua Pengarah hendaklah sesudah itu memberitahu orang yang disurcaj itu.

(3) Lembaga boleh pada bila-bila masa menarik balik apa-apa surcaj yang berkenaan dengannya suatu penjelasan yang memuaskan hati telah diterima atau jika didapati selainnya bahawa tiada surcaj patut dibuat, dan Pengerusi hendaklah dengan segera menyebabkan Ketua Pengarah diberitahu tentang penarikan balik itu.

(4) Amaun apa-apa surcaj yang dibuat di bawah subseksyen (1) dan tidak ditarik balik di bawah subseksyen (3) hendaklah menjadi suatu hutang yang kena dibayar kepada Lembaga daripada orang yang terhadapnya surcaj itu dibuat dan boleh dibawa guaman baginya dan didapatkan dalam mana-mana mahkamah atau guaman Lembaga dan boleh juga didapatkan melalui potongan—

(a) daripada gaji orang yang disurcaj jika Lembaga mengarahkan sedemikian; atau

(b) daripada pencen orang yang disurcaj jika Lembaga mengarahkan sedemikian,

melalui ansuran bulanan yang sama banyak tidak melebihi satu perempat daripada jumlah gaji atau pencen bulanan, mengikut mana-mana yang berkenaan, orang itu.

BAHAGIAN V

KUASA LAIN LEMBAGA

Pewakilan kuasa Lembaga

25. (1) Lembaga boleh, tertakluk kepada apa-apa syarat, batasan atau sekatan sebagaimana yang difikirkannya patut, mewakilkan kepada Pengerusi, Timbalan Pengerusi, Ketua Pengarah atau mana-mana orang lain kuasa dan kewibawaan untuk menjalankan bagi pihaknya apa-apa kuasa, kewajipan atau fungsi yang diletakhakkan

pada atau yang dikenakan ke atas Lembaga oleh Akta ini sebagaimana yang ditentukan oleh Lembaga, kecuali kuasa untuk meminjam wang, mendapatkan pinjaman dan membuat peraturan-peraturan; dan apa-apa kuasa atau fungsi yang diwakilkan sedemikian boleh dijalankan atau dilaksanakan oleh Pengerusi, Timbalan Pengerusi, Ketua Pengarah atau mana-mana orang lain itu, mengikut mana-mana yang berkenaan, di atas nama dan bagi pihak Lembaga.

(2) Tanpa menyentuh keluasan subseksyen (1), Lembaga boleh mewakilkan kepada Pengerusi, Timbalan Pengerusi, Ketua Pengarah, mana-mana daripada anggotanya yang lain atau mana-mana orang, kuasa bagi membenarkan perbelanjaan daripada Kumpulan Wang atau mana-mana wang lain di bawah kawalan Lembaga hingga apa-apa takat yang ditentukan oleh Lembaga dalam hal itu.

Kuasa untuk meminjam

26. (1) Lembaga boleh dari semasa ke semasa meminjam, mengikut apa-apa kadar bunga dan bagi apa-apa tempoh dan atas apa-apa terma tentang masa dan kaedah pembayaran balik dan selainnya, sebagaimana yang diluluskan oleh Menteri dengan persetujuan Menteri Kewangan, apa-apa jumlah wang yang dikehendaki oleh Lembaga bagi menjelaskan mana-mana daripada obligasinya atau bagi menjalankan mana-mana daripada kewajipannya.

(2) Lembaga boleh, dari semasa ke semasa, dengan kelulusan Menteri dan persetujuan Menteri Kewangan, meminjam wang dengan mengeluarkan bon, debentur atau saham debentur atau mendapatkan modal dengan mengeluarkan syer atau saham daripada apa-apa kelas dan nilai dan atas apa-apa terma sebagaimana yang difikirkannya suai manfaat, bagi semua atau mana-mana daripada maksud yang berikut:

- (a) peruntukan bagi modal kerja;
- (b) memenuhi kewajipan Lembaga di bawah Akta ini;
- (c) memenuhi apa-apa fungsi tambahan sebagaimana yang diaku janji oleh Lembaga di bawah Akta ini;
- (d) menebus apa-apa syer atau saham yang ia dikehendaki atau berhak menebusnya; dan
- (e) apa-apa perbelanjaan lain yang boleh dipertanggungjawabkan dengan sepatutnya pada akaun modal.

Pelaburan

27. Aset Lembaga, setakat yang tidak dikehendaki untuk dibelanjakan oleh Lembaga di bawah Akta ini, hendaklah dilaburkan mengikut apa-apa cara sebagaimana yang diluluskan oleh Menteri dengan persetujuan Menteri Kewangan.

Kuasa untuk mengambil kerja ejen

28. Lembaga boleh mengambil kerja dan membayar ejen dan penasihat teknik termasuk peguambela dan peguamcara, jurubank, broker saham, juruukur atau penilai atau orang lain, untuk menjalankan apa-apa urusan atau untuk melakukan apa-apa perbuatan yang dikehendaki dijalankan atau dilakukan pada melaksanakan kewajipan atau untuk menguatkuasakan maksud Akta ini dengan cara yang lebih baik.

Kuasa untuk memberikan pinjaman

29. (1) Pada melaksanakan kewajipannya atau pada menjalankan fungsinya, Lembaga boleh memberikan pinjaman, dan pinjaman itu boleh diberikan tertakluk kepada apa-apa terma dan syarat sebagaimana yang difikirkan oleh Lembaga patut dikenakan dalam hal tertentu.

(2) Jadual Ketiga hendaklah dipakai bagi pinjaman yang diberikan oleh Lembaga di bawah seksyen ini.

Kuasa menubuhkan perbadanan

30. (1) Lembaga boleh dari semasa ke semasa, melalui Perintah yang disiarkan dalam *Warta*, menubuhkan suatu perbadanan dengan apa-apa nama sebagaimana yang difikirkan patut oleh Lembaga untuk melaksanakan dan menjaga, menjalankan dan menguruskan apa-apa projek, skim atau perusahaan yang telah dirancang atau diusahakan oleh Lembaga pada melaksanakan kewajipannya atau menjalankan fungsinya.

(2) Peruntukan Jadual Keempat hendaklah terpakai bagi perbadanan yang ditubuhkan oleh Lembaga di bawah subseksyen (1).

Pengambilan tanah dengan paksa

31. (1) Apabila sesuatu harta tak alih, yang bukan tanah Kerajaan, dikehendaki diambil oleh Lembaga bagi maksud Akta ini, maka harta itu boleh diambil mengikut peruntukan mana-mana undang-undang bertulis yang berhubungan dengan pengambilan tanah bagi sesuatu maksud awam yang pada masa ini berkuat kuasa dalam Negeri itu, dan apa-apa perisytiharan yang dikehendaki oleh mana-mana undang-undang bertulis itu bahawa tanah itu adalah dikehendaki sedemikian boleh dibuat walaupun pampasan akan dibayar oleh Lembaga; dan perisytiharan itu hendaklah berkuat kuasa seolah-olah perisytiharan itu ialah suatu perisytiharan bahawa tanah itu dikehendaki bagi sesuatu maksud awam mengikut undang-undang bertulis itu.

(2) Perbelanjaan dan pampasan mengenai apa-apa harta tak alih yang diambil di bawah seksyen ini hendaklah dibayar oleh Lembaga.

(3) Apabila apa-apa harta tak alih telah diperoleh di bawah seksyen ini, Lembaga hendaklah mengambil cabutan suratan hakmilik yang perlu mengenai harta itu dan hendaklah membayar apa-apa sewa yang dikenakan atas harta itu.

BAHAGIAN VI

AM

32. (*Dipotong oleh Akta 478*).

Obligasi kerahsiaan

33. (1) Kecuali bagi maksud Akta ini atau maksud prosiding jenayah di bawah Akta ini, tiada seorang pun anggota, pegawai atau pekhidmat Lembaga boleh menzahirkan apa-apa maklumat yang telah didapati olehnya semasa menjalankan kewajibannya dan yang tidak disiarkan menurut Akta ini.

(2) Mana-mana orang yang melanggar subseksyen (1) melakukan suatu kesalahan dan, apabila disabitkan boleh dipenjarakan selama tempoh tidak melebihi enam bulan atau didenda tidak melebihi satu ribu ringgit atau kedua-duanya.

Prosiding sivil

34. Walau apa pun peruntukan mana-mana undang-undang bertulis, dalam apa-apa prosiding sivil oleh atau terhadap Lembaga—

- (a) mana-mana orang yang memegang jawatan Peguam Persekutuan dan diberi kuasa oleh Peguam Negara bagi maksud itu; atau
- (b) mana-mana pegawai Lembaga yang diberi kuasa bagi maksud itu dengan arahan yang khas atau am daripada Lembaga,

boleh, bagi pihak Lembaga, mengikut mana-mana yang berkenaan, memulakan, hadir dalam dan menjalankan prosiding itu dan boleh membuat dan melakukan segala kehadiran, perbuatan dan permohonan mengenai prosiding itu.

Kesalahan mengenai pinjaman dan beban membuktikan

35. (1) Mana-mana orang yang—

- (a) mendapat sesuatu pinjaman daripada Lembaga di bawah peruntukan Akta ini dengan cara pernyataan palsu;
- (b) dengan sengaja menggunakan sesuatu pinjaman yang diberikan kepadanya oleh Lembaga di bawah peruntukan Akta ini bagi apa-apa maksud selain maksud yang kerananya pinjaman itu telah diberikan;
- (c) setelah mendapat suatu pinjaman daripada Lembaga di bawah peruntukan Akta ini, dengan sengaja membinasakan apa-apa cagaran yang telah diberikan berhubung dengan mana-mana pinjaman itu,

melakukan suatu kesalahan dan, apabila disabitkan, boleh dipenjarakan selama tempoh tidak melebihi dua tahun atau didenda tidak melebihi lima ribu ringgit atau kedua-duanya.

(2) Mana-mana orang yang melanggar perenggan 6(1)(b) atau 6(2) Jadual Ketiga melakukan suatu kesalahan dan, apabila disabitkan, boleh didenda tidak melebihi satu ribu ringgit.

(3) Dalam sesuatu prosiding jenayah mengenai suatu kesalahan di bawah perenggan (1)(b), beban bagi membuktikan bahawa orang yang dituduh itu telah bertindak dengan suci hati dan tanpa pengetahuan yang dia telah tidak berhak menggunakan pinjaman itu atau apa-apa bahagian daripadanya terletak pada orang yang dituduh itu.

Keizinan Pendakwa Raya

36. Tiada pendakwaan mengenai kesalahan yang terbit daripada peruntukan Akta ini atau berkaitan dengan sesuatu pinjaman yang diberikan di bawah Akta ini boleh dimulakan kecuali dengan keizinan secara bertulis daripada Pendakwa Raya.

Kuasa untuk membuat peraturan-peraturan

37. (1) Lembaga boleh, dengan kelulusan Menteri, membuat apa-apa peraturan sebagaimana yang suai manfaat atau perlu bagi melaksanakan peruntukan Akta ini dengan cara yang lebih baik.

(2) Tanpa menyentuh subseksyen (1), peraturan-peraturan di bawah subseksyen itu boleh dibuat untuk—

- (a) menetapkan cara bagaimana suratan, cek dan surat cara daripada apa-apa jenis hendaklah ditandatangani atau disempurnakan bagi pihak Lembaga;
- (b) menetapkan tanggungjawab dan kawalan bagi pegawai dan pekhidmat Lembaga;
- (c) mengenakan bayaran dalam apa-apa hal sebagaimana yang ditentukan oleh Lembaga;
- (d) mengadakan peruntukan bagi apa-apa perkara sebagaimana yang didapati perlu atau suai manfaat oleh Lembaga berhubung dengan syer, saham, bon, debentur atau saham debentur yang dikeluarkan di bawah Akta ini, dan, khususnya, untuk mengawal selia kaedah pengeluaran, pemindahan hakmilik, penebusan atau urusan lain berkenaan dengan syer, saham, bon, debentur atau saham debentur itu;

- (e) menetapkan cara bagaimana dan terma dan syarat yang berdasarkannya pinjaman boleh diberikan oleh Lembaga di bawah seksyen 29; dan
 - (f) mengadakan peruntukan secara am mengenai penjalanan kuasa dan kewajipannya di bawah peruntukan Akta ini.
- (3) Peraturan-peraturan itu—
- (a) boleh menetapkan bahawa apa-apa perbuatan atau peninggalan yang melanggar peruntukan mana-mana peraturan menjadi suatu kesalahan; dan
 - (b) boleh mengadakan peruntukan bagi pengenaan penalti bagi kesalahan itu dan penalti itu tidak boleh melebihi satu ribu ringgit.

Perkara yang dilakukan pada menjangkakan Akta ini diperbuat

38. Segala perkara yang dilakukan oleh mana-mana orang atau pihak berkuasa bagi pihak Lembaga sebagai persediaan dan ke arah pelaksanaan yang sepatutnya peruntukan Akta ini dan apa-apa perbelanjaan yang dilakukan berhubung dengannya, pada menjangkakan pembuatan Akta ini, hendaklah disifatkan telah dibenarkan oleh Akta ini; dan segala hak dan obligasi yang diperoleh atau ditanggung bagi pihak Lembaga daripada apa-apa jua yang dilakukan sedemikian atau apa-apa perbelanjaan yang dilakukan sedemikian hendaklah disifatkan sebagai hak dan obligasi Lembaga apabila Akta ini mula berkuat kuasa.

JADUAL PERTAMA

[Subseksyen 5(2)]

Terma dan syarat pelantikan, pembatalan atau peletakan jawatan

1. (1) Seseorang anggota Lembaga hendaklah memegang jawatan selama apa-apa tempoh dan tertakluk kepada apa-apa syarat sebagaimana yang ditentukan oleh Menteri dalam surat cara pelantikannya.

(2) Pelantikan seseorang anggota boleh dibatalkan pada bila-bila masa oleh Menteri tanpa memberikan apa-apa sebab baginya.

(3) Seseorang anggota boleh meletakkan jawatannya pada bila-bila masa melalui surat yang dialamatkan kepada Menteri.

(4) Seseorang anggota hendaklah menumpukan masa kepada urusan Lembaga sebagaimana yang perlu bagi menjalankan kewajipannya.

Jawatan disifatkan dikosongkan

2. (1) Jawatan seseorang anggota Lembaga hendaklah menjadi kosong—

- (a) jika dia mati;
- (b) jika telah dibuktikan terhadapnya, atau jika dia telah disabitkan atas, suatu pertuduhan berkenaan dengan—
 - (i) kesalahan yang melibatkan fraud, kecurangan atau keburukan akhlak;
 - (ii) kesalahan di bawah mana-mana undang-undang yang berhubungan dengan rasuah; atau
 - (iii) apa-apa kesalahan lain yang boleh dihukum dengan pemenjaraan (sama ada pemenjaraan sahaja atau sebagai tambahan kepada denda atau sebagai ganti denda) selama lebih daripada dua tahun;
- (c) jika dia menjadi bankrap;
- (d) jika dia tidak sempurna akal atau selainnya tidak berupaya menjalankan kewajipannya;
- (e) jika dia tidak menghadiri mesyuarat tiga kali berturut-turut tanpa kebenaran Lembaga;
- (f) sekiranya peletakan jawatannya diterima oleh Menteri; atau
- (g) jika pelantikannya dibatalkan.

(2) Jika seseorang anggota terhenti menjadi anggota oleh sebab mana-mana peruntukan Akta ini, seorang lain hendaklah dilantik bagi menggantikannya mengikut peruntukan yang terpakai bagi anggota itu.

Saraan dan elaun

3. Hendaklah dibayar kepada anggota Lembaga atau mana-mana orang lain apa-apa gaji, saraan atau elaun sebagaimana yang ditetapkan oleh Lembaga selepas berunding dengan Menteri.

Mesyuarat

4. (1) Lembaga hendaklah bermesyuarat sekurang-kurangnya sekali dalam tiap-tiap dua bulan.

(2) Kuorum Lembaga ialah empat orang.

(3) Dalam semua mesyuarat Lembaga, Pengerusi atau, sekiranya Pengerusi tidak hadir, Timbalan Pengerusi atau, sekiranya Timbalan Pengerusi tidak hadir, anggota sebagaimana yang dipilih oleh anggota yang hadir, hendaklah mempengerusikan mesyuarat itu.

(4) Jika mengenai apa-apa persoalan yang hendak diputuskan oleh Lembaga terdapat bilangan undi yang sama banyak, Pengerusi, Timbalan Pengerusi atau anggota yang mempengerusikan mesyuarat itu hendaklah mempunyai undi pemutus selain undi biasanya.

(5) Tertakluk kepada subperenggan (1), (2), (3) dan (4), Lembaga hendaklah menetapkan tatacaranya sendiri.

Lembaga boleh menjemput orang lain ke mesyuarat

5. Lembaga boleh meminta mana-mana orang (yang bukan seorang anggota Lembaga) menghadiri sesuatu mesyuarat atau pertimbangtelitian Lembaga bagi maksud menasihati Lembaga mengenai apa-apa perkara yang sedang dibincangkannya, tetapi seseorang yang hadir sedemikian tidak mempunyai apa-apa hak untuk mengundi dalam mesyuarat atau pertimbangtelitian tersebut.

Meterai perbadanan

6. (1) Lembaga hendaklah mempunyai suatu meterai perbadanan yang mengandungi suatu reka bentuk yang diluluskan oleh Lembaga dan meterai boleh dari semasa ke semasa dipecahkan, ditukar, diubah atau dibuat baru sebagaimana yang difikirkan patut oleh Lembaga.

(2) Sehingga suatu meterai diadakan oleh Lembaga, suatu cap yang mengandungi perkataan "Lembaga Pertubuhan Peladang" bolehlah digunakan dan hendaklah disifatkan sebagai meterai perbadanan.

(3) Meterai perbadanan atau cap yang disebut dalam subperenggan (2) hendaklah disimpan dalam jagaan Pengerusi atau mana-mana orang lain yang diberi kuasa oleh Lembaga, dan hendaklah disahkan oleh sama ada Pengerusi atau mana-mana orang yang diberi kuasa itu atau oleh seseorang pegawai yang diberi kuasa oleh salah seorang daripada mereka dengan bertulis; dan segala surat ikatan, suratan atau surat cara lain yang berupa sebagai dimeteraikan dengan meterai tersebut, disahkan seperti yang disebut terdahulu hendaklah disifatkan telah disempurnakan dengan sah sehingga dibuktikan sebaliknya:

Dengan syarat bahawa apa-apa suratan atau surat cara yang jika disempurnakan oleh seseorang yang bukan suatu pertubuhan perbadanan tidak akan dikehendaki dimeteraikan boleh dengan cara demikian disempurnakan oleh Lembaga dan mana-mana suratan atau surat cara itu boleh disempurnakan bagi pihak Lembaga oleh mana-mana pegawai atau pekhidmat Lembaga yang diberi kuasa secara am atau khas oleh Lembaga bagi maksud itu.

(4) Meterai Lembaga hendaklah diberi pengiktirafan rasmi dan kehakiman.

Penzahiran kepentingan

7. Seseorang anggota Lembaga yang secara langsung atau secara tidak langsung, mempunyai sendiri atau melalui pekongsinya, apa-apa kepentingan dalam sesuatu syarikat atau perusahaan yang dengannya Lembaga bercadang hendak membuat sesuatu kontrak atau yang mempunyai apa-apa kepentingan dalam sesuatu kontrak itu atau dalam apa-apa perkara yang sedang dibincangkan oleh Lembaga hendaklah menzahirkan hakikat mengenai kepentingannya dan jenis kepentingannya itu kepada Lembaga, dan penzahiran itu hendaklah direkodkan dalam minit Lembaga, dan melainkan jika dibenarkan secara khusus bagi maksud itu oleh Pengerusi, ahli itu tidak boleh mengambil apa-apa bahagian dalam apa-apa pertimbangan atau keputusan Lembaga yang berhubungan dengan kontrak itu.

Minit

8. (1) Lembaga hendaklah menyebabkan minit bagi semua mesyuarat Lembaga disengkarakan dan disimpan dalam bentuk yang sepatutnya.

(2) Apa-apa minit yang dibuat bagi mesyuarat-mesyuarat Lembaga jika ditandatangani dengan sewajarnya, boleh diterima sebagai keterangan dalam semua prosiding undang-undang tanpa bukti selanjutnya dan tiap-tiap mesyuarat Lembaga yang minit mengenai prosidingnya telah dibuat sedemikian hendaklah disifatkan telah dipanggil dan diadakan dengan sewajarnya dan semua anggota dalamnya layak dengan sewajarnya untuk bertindak.

Kesahan perbuatan dan prosiding

9. Tiada perbuatan yang dilakukan atau prosiding yang diambil di bawah Akta ini boleh dipersoalkan atas alasan—

- (a) apa-apa kekosongan dalam keanggotaan atau apa-apa kecacatan dalam penubuhan Lembaga;
- (b) pelanggaran oleh mana-mana anggota Lembaga berhubung dengan penzahiran kepentingan oleh anggota itu; atau
- (c) apa-apa peninggalan, kecacatan, atau luar aturan yang tidak menyentuh merit kes itu.

JADUAL KEDUA**[Seksyen 18]**

1. Peraturan-peraturan yang dibuat di bawah seksyen 18 boleh mengadakan peruntukan bagi segala atau mana-mana daripada yang berikut:

- (a) mengadakan peraturan mengenai amaun gaji, bayaran dan elaun yang kena dibayar kepada pegawai dan pekhidmat Lembaga;

- (b) mengadakan peraturan mengenai pemberian cuti kepada pegawai dan pekhidmat itu;
- (c) membenarkan pembayaran segala elaun kepada pegawai dan pekhidmat tersebut semasa bercuti;
- (d) menentukan saraan yang hendaklah dibayar kepada orang-orang yang dilantik untuk memangku jawatan pegawai atau pekhidmat itu semasa mereka bercuti;
- (e) mengadakan peraturan mengenai tempoh perkhidmatan bagi semua pegawai dan pekhidmat itu;
- (f) memberikan pinjaman kepada pegawai dan pekhidmat untuk membeli basikal, motorsikal, motokar, rumah atau bagi apa-apa maksud lain yang diluluskan oleh Menteri;
- (g) menentukan syarat yang di bawahnya ganjaran atau elaun ihsan boleh dibayar kepada pegawai dan pekhidmat yang tercedera atau kepada saudara-mara yang masih hidup bagi pegawai dan pekhidmat yang terbunuh semasa menjalankan kewajipan mereka;
- (h) mengadakan, menyenggarakan dan mentadbirkan suatu skim pencen bagi membayar pencen, ganjaran atau elaun lain apabila pegawai dan pekhidmat Lembaga diberhentikan kerja oleh sebab tua, meletakkan jawatan, bersara atau dilepaskan daripada jawatan dan bagi menubuhkan dan menyenggarakan suatu kumpulan wang pencen;
- (i) mengadakan dan mentadbirkan suatu skim persaraan bagi memberi apa-apa ganjaran dan elaun sebagaimana yang difikirkan suai manfaat apabila pegawai dan pekhidmat rendah Lembaga mati, diberhentikan kerja oleh sebab tua, meletakkan jawatan, bersara atau dilepaskan daripada jawatan dan bagi memberi apa-apa ganjaran dan elaun sebagaimana yang difikirkan suai manfaat kepada seorang atau beberapa orang daripada orang tanggungan yang masih hidup bagi mana-mana orang yang, setelah bekerja sebagai pegawai atau pekhidmat rendah Lembaga, mati selepas diberhentikan oleh sebab tua atau dilepaskan daripada jawatan atau selepas meletakkan jawatan atau bersara;
- (j) mengawal selia tata tertib ke atas pegawai dan pekhidmat Lembaga;
- (k) peruntukan mengenai tahan kerja dengan pengurangan gaji atau apa-apa saraan lain, atau peruntukan mengenai penggantungan kerja tanpa gaji atau saraan lain, seseorang pegawai atau pekhidmat Lembaga sementara menanti prosiding tata tertib selesai;
- (l) mewujudkan apa-apa kesalahan tata tertib dan mengadakan peruntukan mengenai apa-apa hukuman tata tertib sebagaimana yang difikirkan sesuai oleh Lembaga dan hukuman yang diperuntukkan sedemikian boleh meliputi pembuangan kerja atau penurunan pangkat;

- (m) menetapkan prosedur bagi prosiding tatatertib yang hendaklah memberi orang yang terhadapnya prosiding tatatertib diambil peluang untuk membuat representasi terhadap pertuduhan tatatertib yang dibuat terhadapnya sebelum keputusan dicapai oleh Jawatankuasa Tatatertib kecuali dalam hal yang berikut:
- (i) jika seseorang pegawai atau pekhidmat Lembaga dibuang kerja atau diturunkan pangkat atas alasan kelakuan yang berkenaan dengannya suatu pertuduhan jenayah telah dibuktikan terhadapnya;
 - (ii) jika Lembaga, atas syor Menteri yang dipertanggungjawabkan dengan tanggungjawab bagi hal ehwal dalam negeri, berpuas hati bahawa demi kepentingan keselamatan Malaysia atau mana-mana bahagiannya adalah tidak suai manfaat untuk menjalankan kehendak perenggan ini; atau
 - (iii) jika telah dibuat terhadap seseorang pegawai atau pekhidmat Lembaga apa-apa perintah tahanan, pengawasan, kediaman terhad, buang negeri atau deportasi, atau jika telah dikenakan terhadap seseorang pegawai atau pekhidmat Lembaga apa-apa bentuk sekatan atau pengawasan dengan bon atau selainnya, di bawah mana-mana undang-undang yang berhubungan dengan keselamatan Malaysia atau mana-mana bahagiannya, pencegahan jenayah, tahanan pencegahan, kediaman terhad, buang negeri, imigresen atau perlindungan wanita dan gadis; dan
- (n) prosedur bagi pendengaran rayuan oleh Lembaga Rayuan Tatatertib atau Menteri.

1A. Bagi maksud subperenggan 1(m), “pegawai” termasuklah Ketua Pengarah.

2. Peruntukan berikut hendaklah terpakai bagi mana-mana peraturan yang dibuat menurut subperenggan 1(g), (h) dan (i)—

- (a) tiada ganjaran, elaun atau apa-apa bayaran lain yang kena dibayar di bawah mana-mana peraturan itu dan juga tiada apa-apa hak atau kepentingan yang diperolehi oleh mana-mana orang terhadap apa-apa ganjaran, elaun atau bayaran lain di bawahnya boleh diserahkan atau dipindahmilikan atau ditahan, diasingkan atau dilevi bagi atau mengenai apa-apa jua hutang atau tuntutan kecuali hutang yang kena dibayar kepada Lembaga;
- (b) apabila seseorang mati, apa-apa wang yang dibayar di bawah mana-mana peraturan itu hendaklah disifatkan sebagai teramanah untuk orang yang berhak kepadanya mengikut wasiat si mati itu atau apabila dia mati tidak berwasiat, tetapi tidak boleh disifatkan sebagai menjadi sebahagian daripada harta pusakanya atau sebagai tertakluk kepada hutangnya;
- (c) mana-mana orang boleh, dengan wasiat atau dengan suatu memorandum yang ditandatangani olehnya, melantik seorang pemegang amanah bagi wang yang kena dibayar di bawah mana-mana peraturan itu apabila dia mati, dan boleh mengadakan peruntukan bagi melantik seorang atau beberapa orang pemegang amanah baru bagi wang itu dan bagi melaburkannya;

- (d) jika pada masa kematian seseorang si mati atau pada bila-bila masa kemudiannya tidak ada seorang pemegang amanah bagi wang itu atau adalah suai manfaat seorang atau beberapa orang pemegang amanah baru dilantik, maka dalam hal yang demikian itu seorang atau beberapa orang pemegang amanah atau seorang atau beberapa orang pemegang amanah baru boleh dilantik oleh Mahkamah Tinggi atau seorang Hakim Mahkamah Tinggi;
- (e) resit daripada seorang atau beberapa orang pemegang amanah yang telah dilantik dengan sempurna atau, jika tiada pemegang amanah telah dilantik, resit daripada wakil diri di sisi undang-undang bagi seseorang simati, hendaklah menjadi suatu penjelasan bagi apa-apa wang yang kena dibayar di bawah mana-mana peraturan itu apabila orang itu mati;
- (f) seseorang pekerja Lembaga yang boleh selainnya berhak mendapat apa-apa faedah di bawah mana-mana peraturan itu, jika dia dibuang kerja daripada perkhidmatan Lembaga kerana fraud atau kecurangan atau salah laku, yang melibatkan kerugian wang kepada Lembaga, atau bersara atau meletakkan jawatan dengan niat hendak mengelakkan daripada dilepaskan daripada jawatan atau dibuang kerja akibat fraud, kecurangan atau salah laku itu, adalah terlucut haknya dan hilang kesemua atau sebahagian daripada faedah itu sebagaimana yang diarahkan oleh Lembaga menurut budi bicara mutlaknya; dan
- (g) dengan kelulusan Menteri, Lembaga boleh, menurut budi bicaranya, sebagai penghargaan terhadap perkhidmatan lama atau perkhidmatan istimewa mana-mana pegawai atau penjawat Lembaga yang halnya tidak termasuk dalam bidang dan kuat kuasa skim pencen atau peraturan-peraturan skim persaraan Lembaga, membayar kepada pegawai atau penjawat itu apabila dia mati suatu ganjaran atau elaun ihsan mengikut apa-apa terma dan syarat yang ditentukan oleh Lembaga.

JADUAL KETIGA

[Seksyen 29]

Gadaian harta dan pinjaman dibayar terlebih dahulu

1. Jika pinjaman diberikan oleh Lembaga atas cagaran apa-apa harta yang digadaikan atau digadaikan kepada, sama ada berserta atau tidak berserta dengan apa-apa cagaran lain, mulai dari atau selepas tarikh gadaian atau gadai janji itu, harta itu hendaklah dipertanggungjawabkan membayar pinjaman itu dan bunganya sebagaimana yang tersebut dalam gadaian atau gadai janji itu, terlebih dahulu, kecuali setakat yang dinyatakan selainnya dalam gadaian atau gadai janji itu, daripada segala hutang, gadaian atau gadai janji lain berkenaan dengan harta itu kecuali apa-apa pinjaman yang kena dibayar kepada mana-mana pemiutang yang tidak bersetuju dengan pembayaran terlebih dahulu itu dan pinjaman itu telah diberikan dengan suci hati sebelum pinjaman yang diberikan oleh Lembaga itu dan yang telah diberikan cagaran dengan menggadaikan atau menggadaikan harta itu kepada orang yang berhak sebagai pemiutang *bona fide* mendapat pembayaran balik pinjaman itu berserta bunganya dan gadaian atau gadai janji itu telah disempurnakan dan didaftarkan dengan sepatutnya.

Bunga atas pinjaman yang diberikan oleh Lembaga

2. Pada memberikan sesuatu pinjaman di bawah peruntukan Akta ini, Lembaga boleh mengenakan apa-apa kadar bunga sebagaimana yang difikirkan patut dalam sesuatu hal tertentu.

Pembayaran balik pinjaman yang diberikan oleh Lembaga

3. Tertakluk kepada perenggan 4 dan 5, tiap-tiap pinjaman hendaklah dibayar balik kepada Lembaga mengikut terma dan syarat yang pinjaman itu telah diberikan dan wang yang dibayar balik itu hendaklah dimasukkan kira dalam akaun Lembaga.

Menggantung pembayaran wang pokok dan bunga dan kuasa untuk melanjutkan masa, mengkompaun atau melepaskan

4. Lembaga boleh—

- (a) menangguhkan, selama suatu tempoh tidak lebih daripada lima tahun, pembayaran apa-apa jumlah wang yang genap masanya bagi wang pokok dan bunga atau bagi sama ada wang pokok atau bunga berkenaan dengan pinjaman yang telah diberikan olehnya atas apa-apa terma dan syarat yang difikirkannya perlu bagi melaksanakan maksud yang kerananya pinjaman itu telah diberikan dan bagi membayar balik pada akhirnya wang pokok itu atau apa-apa bunga sebagaimana yang difikirkannya perlu;
- (b) dari semasa ke semasa melanjutkan tempoh bagi membayar balik sesuatu pinjaman, atau mengkompaun atau melepaskan sesuatu pinjaman atau sebahagian daripadanya atas apa-apa terma dan syarat sebagaimana yang difikirkannya patut.

Membayar balik pinjaman sebelum tarikh yang sepatutnya

5. Lembaga boleh pada bila-bila masa menerima pembayaran kesemua atau sebahagian daripada jumlah wang pokok pinjaman dan bunganya sebelum genap masanya kena dibayar, atas apa-apa terma dan syarat sebagaimana yang difikirkannya patut.

Siasatan tentang penggunaan wang yang dipinjamkan

6. (1) Jika Lembaga telah memberi sesuatu pinjaman wang di bawah peruntukan Akta ini, ia boleh—

- (a) dari semasa ke semasa, menjalankan atau menyebabkan dijalankan apa-apa siasatan yang perlu bagi memastikan bahawa pinjaman itu digunakan bagi maksud yang ia telah diberikan;
- (b) meminta laporan termasuk penyata kewangan yang mengandungi apa-apa butir sebagaimana yang ditetapkan olehnya dihantar oleh orang, badan atau pihak berkuasa yang menerima pinjaman itu dan orang, badan atau pihak berkuasa itu hendaklah mematuhi permintaan itu.

(2) Lembaga boleh memberi kuasa dengan bertulis kepada mana-mana pegawainya atau mana-mana orang lain untuk menjalankan siasatan itu, dan orang, badan atau pihak berkuasa yang menerima pinjaman itu hendaklah mengemukakan kepada pegawai atau orang itu semua buku, suratan dan perkara lain dan benda lain yang perlu bagi maksud siasatan itu.

Perintah Lembaga selepas siasatan dijalankan

7. Jika selepas suatu siasatan dijalankan di bawah perenggan 6, ternyata pada Lembaga bahawa apa-apa wang yang terdiri daripada kesemua atau sebahagian daripada pinjaman itu telah tidak digunakan bagi maksud yang pinjaman itu diberikan, Lembaga boleh memerintahkan supaya wang itu digunakan dalam tempoh yang disebut dalam perintah itu bagi maksud itu atau supaya wang itu berserta bunganya pada tarikh perintah itu dibayar balik kepada Lembaga dalam tempoh yang disebut dalam perintah itu, dan apa-apa wang berserta bunganya yang diperintahkan sedemikian supaya dibayar balik kepada Lembaga hendaklah dengan itu menjadi suatu hutang yang kena dibayar kepada Lembaga.

Menyalahgunakan pinjaman yang dicagarkan melalui gadai janji atau selainnya

8. (1) Jika sesuatu pinjaman yang diberikan di bawah peruntukan Akta ini atau sebahagian daripada pinjaman itu telah disalahgunakan, Lembaga boleh—

- (a) jika pinjaman itu telah dicagarkan melalui gadaian atau gadai janji, melalui notis bertulis yang dialamatkan kepada penggadai atau penggadai janji itu, meminta balik pinjaman tersebut atau sebahagian daripadanya dan boleh menghendaki supaya pinjaman atau sebahagiannya itu berserta bunga atas pinjaman itu atau atas sebahagian daripadanya pada tarikh notis itu, dibayar balik pada tarikh yang dinyatakan dalam notis itu dan sekiranya tidak dibayar pada tarikh yang tidak dinyatakan itu, apa-apa cagaran yang diberikan bagi maksud pinjaman itu bolehlah dengan itu dihasilkan;
- (b) jika pinjaman itu telah dicagarkan selain secara gadaian atau gadai janji, melalui notis yang dialamatkan kepada peminjam, meminta supaya pinjaman itu atau sebahagian daripadanya berserta apa-apa bunga pada tarikh notis itu dibayar balik pada tarikh yang dinyatakan dalam notis itu dan jika sekiranya tidak dibayar pada tarikh yang dinyatakan itu apa-apa cagaran yang diberikan bagi maksud pinjaman itu bolehlah dengan itu dihasilkan.

(2) Subperenggan (1) adalah sebagai tambahan kepada apa-apa prosiding lain di bawah mana-mana undang-undang bertulis yang lain.

Penguatkuasaan cagaran

9. Jika apa-apa harta yang digadai atau digadaijanjikan sebagai cagaran bagi sesuatu pinjaman di bawah peruntukan Akta ini dijual bagi maksud menguatkuasakan cagaran itu, Lembaga boleh membeli harta itu dan boleh sama ada menguruskan dan memegang harta itu atau menjual atau selainnya melupuskannya sebagaimana yang difikirkannya patut.

JADUAL KEEMPAT

[Seksyen 30]

Kuasa Lembaga untuk membuat peraturan-peraturan berkenaan dengan perbadanan

1. Lembaga hendaklah, pada atau sebelum tarikh sesuatu perbadanan ditubuhkan di bawah seksyen 30, membuat peraturan-peraturan berkenaan dengan perbadanan itu yang menentukan-

- (a) maksud dan tujuan perbadanan itu ditubuhkan;
- (b) hak, kuasa, kewajipan dan fungsi perbadanan itu;
- (c) sistem pengurusannya; dan
- (d) hubungan antara perbadanan itu dengan Lembaga dan hak-hak pengawalannya ke atas perbadanan itu.

Kecualian

2. Tiada apa-apa jua dalam perenggan 1 boleh disifatkan memberi kuasa kepada Lembaga untuk membuat peraturan-peraturan untuk menubuhkan sesuatu perbadanan bagi apa-apa maksud atau tujuan yang lebih luas ruang lingkupnya daripada maksud atau tujuan yang Lembaga telah ditubuhkan atau memberi sesuatu perbadanan apa-apa hak, kewajipan, kuasa atau fungsi yang tidak termasuk dalam hak, kewajipan, kuasa atau fungsi Lembaga di bawah Akta ini.

Peraturan-peraturan tertakluk kepada Akta ini

3. Tertakluk kepada peruntukan Akta ini dan mana-mana peraturan yang dibuat di bawah seksyen 37, sesuatu perbadanan hendaklah terikat dengan mana-mana peraturan yang dibuat berkenaan dengannya dan peraturan-peraturan itu hendaklah berkuat kuasa bagi segala maksud seolah-olah peraturan-peraturan itu telah diperbuat dalam Akta ini.

Pindaan peraturan-peraturan

4. Lembaga boleh pada bila-bila masa meminda, membatalkan atau membuat tambahan kepada, mana-mana peraturan yang dibuat berkenaan dengan sesuatu perbadanan di bawah perenggan 1 dan seksyen 34 Akta Tafsiran 1948 dan 1967 [Akta 388] hendaklah terpakai bagi mana-mana peraturan yang dipinda atau dibatalkan itu seolah-olah peraturan itu ialah undang-undang bertulis.

Daftar perbadanan

5. Lembaga hendaklah menyimpan suatu daftar dalam bentuk yang ditetapkan mengenai semua perbadanan yang ditubuhkan olehnya di bawah seksyen 30 dan daftar itu bersama dengan salinan segala peraturan yang dibuat di bawah perenggan 1 hendaklah terbuka untuk diperiksa oleh orang awam di mana-mana satu atau beberapa tempat dan pada bila-bila masa yang ditetapkan olehnya.

Penggulungan

6. (1) Lembaga boleh dengan perintah yang disiarkan dalam *Warta* mengarahkan supaya mana-mana perbadanan yang ditubuhkan olehnya digulung dan dibubarkan.

(2) Apabila sesuatu perbadanan dibubarkan di bawah perenggan ini, aset perbadanan itu hendaklah dipindahkan kepada dan diletakhakkan pada Lembaga setelah segala tanggungan dijelaskan.

(3) Penggulungan sesuatu perbadanan di bawah perenggan ini hendaklah dijalankan mengikut apa-apa cara sebagaimana yang ditetapkan oleh Lembaga.

Perbadanan hendaklah menjadi pertubuhan perbadanan

7. Tiap-tiap perbadanan yang ditubuhkan di bawah seksyen 30 hendaklah menjadi pertubuhan perbadanan dengan apa-apa nama yang diberikan oleh Lembaga dan hendaklah kekal turun-temurun dan mempunyai suatu meterai perbadanan dan boleh mendakwa dan didakwa atas nama itu, dan bagi maksud melaksanakan projek pembangunan berdaftar yang kerananya ia telah ditubuhkan ia boleh membuat kontrak dan boleh memegang, berniaga atau membuat apa-apa urusan berkenaan dengan harta alih atau harta tak alih dan boleh melakukan segala perkara dan benda lain yang bersampingan atau berkaitan dengan sesuatu pertubuhan perbadanan, yang tidak berlawanan dengan peruntukan Akta ini dan dengan tertakluk kepada apa-apa sekatan atau batasan sebagaimana yang ditetapkan oleh Lembaga dalam setiap hal.

Meterai perbadanan bagi perbadanan

8. (1) Tiap-tiap perbadanan hendaklah mempunyai suatu meterai perbadanan yang mengandungi suatu reka bentuk yang diluluskan oleh perbadanan itu dengan persetujuan Lembaga, dan meterai itu boleh dari semasa ke semasa dipecahkan, ditukar, diubah dan dibuat baru oleh perbadanan dengan persetujuan Lembaga, sebagaimana yang difikirkannya patut.

(2) Sehingga suatu meterai diadakan oleh perbadanan di bawah perenggan ini, suatu cap yang mengandungi nama perbadanan melingkungi huruf "LPP" boleh digunakan sebagai suatu meterai perbadanan.

(3) Meterai perbadanan atau cap yang disebut dalam subperenggan (2) hendaklah berada dalam jagaan seseorang yang diarahkan oleh perbadanan dan hendaklah disahkan oleh orang itu, dan semua surat ikatan, suratan dan surat cara lain yang berupa sebagai dimeteraikan dengan meterai tersebut, disahkan sebagaimana yang disebut terdahulu, hendaklah disifatkan telah disempurnakan dengan sah sehingga dibuktikan sebaliknya:

Dengan syarat bahawa apa-apa suratan atau surat cara yang, jika disempurnakan oleh seseorang yang bukan suatu pertubuhan perbadanan, tidak akan dikehendaki dimeteraikan dengan meterai boleh disempurnakan dengan cara demikian itu juga oleh perbadanan; dan mana-mana suratan atau surat cara itu boleh disempurnakan bagi pihak perbadanan oleh mana-mana pegawai atau penjawat perbadanan itu yang diberi kuasa secara am atau khas oleh perbadanan bagi maksud itu.

(4) Meterai tiap-tiap perbadanan hendaklah diberi pengiktirafan rasmi dan kehakiman.

UNDANG-UNDANG MALAYSIA**Akta 110****AKTA LEMBAGA PERTUBUHAN PELADANG 1973**

SENARAI PINDAAN

Undang-undang yang meminda	Tajuk ringkas	Berkuat kuasa dari
Akta 160	Akta Mata Wang Malaysia (Ringgit) 1975 (Akta 160)	29-08-1975
Akta A760	Akta Lembaga Pertubuhan Peladang (Pindaan) 1990	01-08-1990
Akta 478	Akta Pembatalan Pengecualian Daripada Bayaran Duti-duti Setem 1992	21-02-1992
Akta A1050	Akta Lembaga Pertubuhan Peladang (Pindaan) 1999	01-09-1999

UNDANG-UNDANG MALAYSIA**Akta 110****AKTA LEMBAGA PERTUBUHAN PELADANG 1973****SENARAI SEKSYEN YANG DIPINDA**

Seksyen	Kuasa meminda	Berkuat kuasa dari
17	Akta A760 Akta A1050	01-08-1990 01-09-1999
17A	Akta A1050	01-09-1999
17B	Akta A1050	01-09-1999
24A	Akta A760	01-08-1990
32	Akta A478	21-02-1992
33	Akta 160	29-08-1975
35	Akta 160	29-08-1975
37	Akta 160	29-08-1975
Jadual Kedua	Akta A760 Akta A1050	01-08-1990 01-09-1999
